

歷

代

賦

話

歷代賦話卷九

嘉善浦 銑柳愚輯

五代史

桑維翰字國僑河南人初舉進士主司惡其姓以爲桑  
喪同音人有勸其不必舉進士可以從他求仕者維翰  
慨然乃著日出扶桑賦以見志卒以進士及第晉臣傳

銑按宋史藝文志桑維翰賦二卷

扈載字仲熙北燕人也少好學善屬文廣順初舉進士  
高第拜校書郎直史館再遷監察御史其爲文章以辭  
多自喜嘗次歷代有國廢興治亂之迹爲運源賦甚詳  
又因遊相國寺見庭竹可愛作碧鮮賦題其壁世宗問

之遣小黃門就壁錄之覽而稱善因拜水部員外郎知制誥遷翰林學士賜緋

周臣傳

銑按宋史扈蒙傳蒙字日用少能文晉天福中舉進士周廣順中從歸德軍節度趙暉爲掌書記召爲右拾遺直史館知制誥蒙從弟載時爲翰林學士兄弟並掌內外制時號二扈

李懌京兆人也少好學頗工文辭唐末舉進士天成中爲中書舍人翰林學士累遷尚書右丞承旨時右散騎常侍張文寶知貢舉所放進士中書有覆落者乃請下學士院作詩賦爲貢舉格學士竇夢徵張礪等所作不工乃命懌爲之懌笑曰予少舉進士登科蓋偶然耳後

生可畏來者未可量假令子復就禮部試未必不落第  
安能與英俊爲准格聞者多其知體

雜傳

王延字世美鄭州長豐人也少好學嘗以賦謁梁相李

琪琪爲之稱譽薦爲卽墨縣令

周臣傳

劉夔自梁初受封爵稟正朔而已貞明三年卽皇帝位  
國號大越改元曰乾亨性好奢侈悉聚南海珍寶以爲  
玉堂珠殿二年祀天南郊大赦境內改國號漢八年作  
南宮王定保獻南宮七奇賦以美之

南漢世家

銑按夔讀爲儼字書不載蓋其妄作也 定保唐昭

宗光化三年進士爲吳融子華壻撰摭言十五卷記

唐朝進士應舉登科雜事

歷代賦話卷十

嘉善浦 銑柳愚輯

宋史

翰林學士洪邁言貢舉令賦限三百六十字論限五百字今經義論策一道有至三千言賦一篇幾六百言寸晷之下唯務貪多累牘連篇何由精妙宜俾各遵體格以返渾厚

選舉志

銑按張方平知貢舉言今設科選材專取辭藝爾來文格日失其舊今賦或八百字論或千餘字驅扇浮薄重虧雅俗豈取賢歛才備治具之意耶

王師約字君授少習進士業英宗欲求儒生爲主壻命

歷代賦話

卷十

正集

宰相召克臣諭旨令師約持所爲文至第明日獻賦一篇卽坐中賦大人繼明詩遂賜對選爲駙馬都尉尚徐國公主授左衛將軍面賜玉帶又賜九經筆硯勉之進

學

附王審琦傳師約審琦曾孫承行孫克臣子克臣特爲工部侍郎

趙上交涿州范陽人周祖廣順初拜禮部侍郎會將試貢士上交申明條制頗爲精密始復糊名考校擢扈載甲科及取梁周翰董淳之流時稱得士轉戶部侍郎明年再知舉謗議紛然坐所取士李觀侯燦賦落韻改太子詹事宋初起爲尚書右丞

劉濶字德興涿州范陽人後唐清泰中舉進士宋太平興國六年工部侍郎致仕好學博通史傳善屬文嘗作

弔戰國賦萬餘言行于世

賈偁字日章荊州漁陽人漢乾祐二年舉進士周廣順  
初補單州軍事判官遷秘書郎出爲絳州防禦判官天  
初歷武寧軍掌書記西京留守判官天雄歸德軍節度  
判官開寶六年拜右補闕知宋州嘗作遂命賦以自悼

附兄  
儀傳

劉蒙叟字道民乾德中進士車駕北巡令知中宮名表  
獻宋都賦述國家受命建號地宜建都立宗廟時雖

未遑後卒從之

附劉熙  
古傳

李肅字季雍開封府陽武人七歲誦書知大義十歲爲  
詩往往有警語舉進士登甲科嘗作代周顒答北山移

文弔幽憂子文病雜賦意皆有所規焉

附兄穆傳

李昭邁字逢吉宗諤從子也以蔭爲將作監主簿幼時楊億嘗過其家出拜億命爲賦旣成億曰桂林之下無雜木非虛言也其後薦之召試授館閣校勘收集賢院

校理

附李昉傳宗諤昉子

李迪賈邊有時名舉進士迪以賦落韻邊以當仁不讓於師論以師爲衆與注疏異皆不預主文奏乞收試且曰迪雖犯不考然出于不意其過可略邊特立異說將令後生務爲穿鑿漸不可長遂收迪而黜邊

王旦傳

王欽若字定國臨江軍新喻人父仲華侍祖郁官鄂州會江水暴至徙家黃鶴樓漢陽人望見樓上若有光景



是父欽若生欽若早孤郁愛之太宗伐太原時欽若纔十八作平晉賦論獻行在

本傳

林特字士奇祖揆仕閩爲南劍州順昌令因家順昌特少穎悟十歲謁江南李景獻所爲文景奇之命作賦有

頌而成授蘭臺校書郎

附王欽若傳

馮拯字道濟咸平初坐試開封進士賦涉譏訕下拯御史臺未幾釋之

本傳

陳彭年字永年撫州南城人彭年幼好學母唯一子愛之禁其夜讀書彭年篝燈密室不令母知年十三著皇綱論萬餘言爲江左名輩所賞唐主李煜聞之召入宮令子仲宣與之遊金陵平彭年師事徐鉉爲文太平興

國中舉進士在場屋間頗有雋名嘗因京城大酺跨驢  
出游構賦自東華門至闕前已口占數千言然佻薄好  
嘲詠頗爲宋白所黜雍熙二年始中第

本傳

王禹偁字元之濟州鉅野人九歲能文太平興國八年  
擢進士咸平初預修太祖實錄直書其事時宰相張齊  
賢李沆不協意禹偁議論輕重其間出知黃州嘗作三  
黜賦以見志其卒章云屈于身而不屈于道兮雖百謫  
而何虧

本傳

銑按澠水燕談錄王元之初知制誥上疏雪徐鉉貶  
商州召入爲學士坐辨孝章皇后不實謫滁州復召  
知制誥撰太祖尊號冊坐輕誣謫黃州作三黜賦以

自述

梁顥字太素鄆州須城人雍熙二年舉進士廷試方中獻賦太宗召升殿詢其門第賜甲科

銑按宋永亨搜采異聞錄陳正敏遜齋間覽梁灝八十二歲雍熙二年狀元及第其謝啓云白首窮經少伏生之八歲青雲得路多太公之二年後終秘書監卒年九十餘此語既著士大夫亦以爲口實予以國史考之梁雍熙二年廷試甲科景德元年以翰林學士知開封府暴疾卒年四十二子固亦進士甲科至直史館卒年三十二史臣謂梁方當委遇中途天謝又云梁之秀中道而摧明白如此遜齋之妄不待攻

也

呂文仲字子臧歙州新安人文仲在江左舉進士太平興國中上每御便殿觀古碑刻輒召文仲與舒雅杜鎬吳淑讀之嘗令文仲讀文選繼又令讀江海賦皆有賜

賚

本傳

張洞字仲通開封祥符人試開封進士既罷進賦題曰孝慈則忠時方議濮安懿王稱皇事英宗曰張洞意諷朕宰相韓琦進曰言之者無罪聞之者足以戒英宗意

解

本傳

楊大雅字子正素好學日誦數萬言雖飲食不釋卷進士及第咸平中交趾獻犀因奏賦召試遷太常博士

本傳

銑按歐陽文忠作楊公墓誌銘云字子山

郭纘字仲微開封祥符人舉進士中甲科纘性和易文  
思敏瞻尤刻意于賦好用經語對頗近于諧

本傳

李絢字公素邛州依政人仁宗春秋高未有繼嗣絢因  
祀高禱還獻賦大指言宜遠嬖寵近賢良則神降之福  
子孫繁衍帝嘉納之

本傳

范諷字補之以蔭補將作監主簿獻東封賦遷太常奉

禮郎

附范正  
辭傳

楊億字大年建州浦城人祖文逸南唐玉山令億將生  
文逸夢一道士自稱懷玉山人來謁未幾億生七歲能  
屬文雍熙初年十一太宗聞其名詔江南轉運使張去

華就試詞賦送闕下連三日得對試詩賦五篇下筆立  
成太宗深加賞異命內侍都知王仁睿送至中書又賦  
詩一章宰相驚其俊異削章爲賀翌日下制卽授秘書  
省正字特賜袍笏淳化中詣闕獻文改太常寺奉禮郎  
仍令讀書秘閣獻二京賦命試翰林賜進士第遷光祿  
寺丞億有別墅在陽翟億母往視之因得疾請歸省不  
待報而行億素體羸至是以病聞請解官有憲官劾億  
不俟命而去授太常少卿分司西京許就所居養療嘗  
作君可思賦以抒忠憤

本傳

朱台符字拱正眉州眉山人台符少聰穎十歲能屬辭  
嘗作黃山樓記士友稱之及長善詞賦時太宗廷試貢

士多擢敏速者台符與同輩課試以尺晷成一賦淳化三年進士登甲科

本傳

張去華字信臣開封襄邑人去華幼勵學敏于屬辭以蔭補太廟齋郎周世宗平淮南去華時年十八慨然嘆曰兵戰未息民事不修非馭國持久之術因著南征賦治民論獻于行在召試授御史臺主簿

本傳

銑按宋登科記太祖建隆二年進士十一人榜首張去華

樂黃目字公禮撫州宜黃人世仕江左李氏父史字子正齊王景達鎮臨川召奏牋授秘書郎入朝爲平原主簿太平興國五年與顏明遠劉昌言張觀竝以見任官

舉進士太宗惜科第不與但授諸道掌書記史得佐武  
成軍旣而復賜及第上書言事擢爲佐郎知陵州獻金  
明池賦召爲三館編修淳化五年與黃目同在文館人  
以爲榮

本傳

魏震祖浩贍國軍權鹽制置使初用祖蔭當補廷職自  
以習詞業不屑就太宗在藩邸因招寘邸中卽位補殿  
直廬壽八州巡檢雍熙初温州進端木成文震作詩賦  
以獻拜崇儀副使賜白金二千兩

本傳

王曾字孝先青州益都人從學于里人張震善爲文辭  
咸平中由鄉貢試禮部廷對皆第一楊億見其賦歎曰

王佐器也

本傳



晏殊字同叔撫州臨川人七歲能屬文景德初張知白  
安撫江南以神童薦之帝召殊與進士千餘人竝試廷  
中殊神氣不懾援筆立成帝嘉賞賜同進士出身宰相  
寇准曰殊江外人帝顧曰張九齡非江外人耶後二日  
復試詩賦論殊奏臣嘗私習此賦請試他題帝愛其不  
欺既成數稱善擢秘書省正字秘閣讀書命直史館陳  
彭年察其所與遊處者每稱許之明年召試中書遷太  
常寺奉禮郎

本傳

邵亢字興宗丹陽人幼聰發過人方十歲日誦書五千  
言賦詩豪縱鄉先生見者皆驚偉之再試開封當第一  
以賦失韻弗取

本傳

錢易字希白年十七舉進士試崇政殿三篇日未中而就言者惡其輕俊特罷之然自此以才藻知名易再舉進士就開封府試第二自謂當第一爲有司所屈乃上書言試朽索之馭六馬賦意涉譏諷真宗惡其無行降第三明年第二人中第

附錢惟演傳

銑按淳化三年是歲蘇易簡知舉殿試始令糊名考校內出卮言日出賦題試者不能措辭相率叩殿檻上請有錢易者日未中三題皆就以其輕俊特命黜之得孫何以下三百餘人

仲子棐字叔弼廣覽強記能文辭年十三時見修著鳴蟬賦侍側不去修撫之曰兒異日能爲吾此賦否因書

以遺之

附歐陽修傳

司馬光字君實陝州夏縣人也仁宗寶元初中進士甲科年甫冠交趾貢異獸謂之麟光言真偽不可知使其真非自至不足爲瑞願還其獻又奏賦以諷

本傳

銑按沈括夢溪筆談至和中交趾獻麟如牛而大通身皆大鱗首有一角考之記傳與麟不類當時有謂之山犀者然犀不言有鱗莫知其的回詔欲謂之麟則慮夷獠見欺不謂之麟則未有以質之謂之異獸最爲鄭重有體今以予觀之殆天祿也按漢書靈帝中平三年鑄天祿蝦蟆于平津門外注云天祿獸名今鄧州南陽縣北宗資碑旁兩獸鑄其膊一曰天祿

歷代名臣言行錄卷一  
一曰辟邪元豐中予過鄧境聞此石獸尚在使人墨  
其所刻天祿辟邪字觀之似象似隸其獸有角鬣大  
鱗如手掌南豐曾阜爲南陽令題宗資碑陰云二獸  
膊之所刻獨在製作精巧高七尺尾鬣皆鱗甲莫知  
何象而名此也今詳其形甚類交趾所獻異獸知其  
必天祿也

范鎮字景仁成都華陽人薛奎守蜀愛之館於府舍俾  
與子弟講學鎮益自謙退舉進士禮部奏名第一召試  
學士院當得館閣校理主司妄以爲失韻補校勘人爲  
忿鬱而鎮處之晏如仁宗在位三十五年未有繼嗣鎮  
拜疏凡見上面陳者三言益懇切又因祿享獻賦以諷

其後韓琦遂定策立英宗其學本六經契丹高麗皆傳誦其文少時賦長嘯却胡騎晚使遼人相目曰此長嘯公也

本傳

銑按司馬溫公作范忠文傳云召試學士院詩用采  
覓字學士以沈約郊居賦雌覓連蜷讀覓爲入聲謂  
景仁爲失韻由是除館閣校勘殊不知約賦但取聲  
律便美非覓不可讀爲平聲也當時有學者皆爲憤  
鬱而公處之晏然不辨

過字叔黨軾知杭州過年十九以詩賦解兩浙路禮部  
試下及軾爲兵部尚書任右丞務郎自號斜川居士有  
斜川集廿卷其思子臺賦颺風賦早行于世時稱爲小

坡蓋以軾爲大坡也

附蘇軾傳

蘇轍字子由年十九與兄軾同登進士科又同策制舉使契丹館客者侍讀學士王師儒能誦洵軾之文及轍茯苓賦恨不得見全集

本傳

呂大防字微仲哲宗卽位召爲翰林學士權開封府館伴契丹使其使黠語頗及朝廷大防密槌其隱事詰之曰北朝試進士至心獨運賦不知此題于書何出使錯還不能對自是不敢復出媠詞

本傳

銑按周輝清波雜志作杜正獻公事至心獨運作聖心獨悟

元絳字厚之錢塘人絳生而敏悟五歲能作詩九歲調

荆南太守試以三題上諸朝貧不能行長舉進士以廷  
試誤賦韻得學究出身再舉登第

本傳

許將字冲元福州閩人舉進士第一歐陽修讀其賦謂  
曰君辭氣似沂公未可量也

本傳

銑按宋登科記嘉祐八年狀元許將

鮮于侁字子駿閬州人尤長于楚詞蘇軾讀九誦謂近  
屈原宋玉自以爲不可及也

本傳

崔公度字伯易高郵人口吃不能劇談而內絕敏書一  
閱卽不忘歐陽修得其所作感山賦以示韓琦琦上之  
英宗卽付史館授和州防禦推官

本傳

姚祐字伯受湖州長興人元豐末第進士徽宗初除夔

州路轉運判官且行會帝幸禁苑御弓矢祐奏聖主臨射賦帝大悅留爲左正言

本傳

劉延慶保安軍人世爲將家雄豪有勇北伐督兵十萬渡白溝河延慶行軍無紀律至良鄉遼將蕭幹帥衆來延慶與戰敗績延慶營于盧溝南見火起以爲敵至燒營而奔相蹂踐死者百餘里自熙豐以來所儲軍實殆盡退保雄州燕人作賦及歌誚之

陳橐字德應紹興餘姚人博學剛介不事產業旣謝事歸剡中僑寓僧寺日糴以食處之泰然王十朋爲風土賦論近世會稽人物曰杜祁公之後有陳德應云

本傳

尤袤字延之常州無錫人少穎異蔣偕施垌呼爲奇童



入太學以詞賦冠多士尋冠南宮紹興十八年擢進士  
嘗取孫綽遂初賦以自號光宗書扁賜之有遂初小藁

六十卷

本傳

袁樞字機仲建之建安人幼力學嘗以修身爲弓賦試  
國子監周必大劉珙皆期以遠器試禮部詞賦第一

本傳

洪咨夔字聖俞於潛人嘉定二年進士授如臯主簿尋  
試爲饒州教授作大冶賦樓鑰賞識之授南外宗學教  
授

本傳

孔維字爲則開封雍邱人乾德四年九經及第雍熙三  
年擢爲國子司業上書請禁原蠶以利國馬直史館樂  
史駁之曰吳都賦曰國賦再熟之稻鄉貢八蠶之綿則

歷代賦話

卷十

正集

七

蠶之有原其來舊矣今孔維請禁原蠶以利國馬徒引前經物類同氣之文不究時事確實之理編民之內貧窶者多春蠶所成止充賦調之備晚蠶薄利始及卒歲之資今若禁其後圖必有因緣爲弊滋彰撓亂民豈遑寧上覽之遂寢晚蠶之禁

儒林傳

孔宜字不疑兗州曲阜人孔子四十四世孫舉進士不第乾德中詣闕上書述其家世詔以爲曲阜主簿歷黃州軍事推官遷司農寺丞掌星子鎮市征後以爲南康軍宜代還獻文賦數十篇太宗覽而嘉之召見問以孔子世嗣因下詔司農寺丞宜可太子右贊善襲封文宣

公後其家

全上

梁周翰字元褒鄭州管城人周翰好學十歲能屬詞周廣順二年舉進士宋初爲秘書郎直史館乾德中獻擬制二十編擢爲右拾遺會修大內上五鳳樓賦人多傳誦之五代以來文體卑弱周翰與高錫柳開范杲習尚淳古齊名友善當時有高梁柳范之稱

文苑傳

銑按呂成公宋文鑑賦以五鳳樓歷卷 五鳳樓在

河南府城後梁太祖卽位羅彥威取魏良材爲之

朱昂字舉之其先京兆人父葆光挈家南渡寓潭州樂衡山之勝遂往家焉昂少與熊若谷鄧洵美同學朱遵度好讀書人號之爲朱萬卷目昂爲小萬卷宋初爲衡州錄事參軍嘗讀陶潛閒情賦而慕之因廣其辭

銑按賦載本傳

趙隣幾字亞之鄆州須城人家世爲農隣幾少好學能屬文嘗作禹別九州賦凡萬餘言人多傳誦周顯德二年舉進士太平興國初召爲左贊善大夫直史館

銑按宋史藝文志趙隣幾禹別九州賦三卷

和蒙字顯仁凝第四子也生五六歲凝教之誦古賦一歷輒不忘太平興國八年擢進士第獻所著文賦五十軸召試中書擢爲太子中允淳化三年春獻觀燈賦詔付史館遷右正言

鞠常字可久密州高密人少好學善屬文漢乾祐二年擢進士第開寶中擢爲著作郎常應舉時著四時成歲

賦萬餘言又爲春蘭賦頗存典故

夏侯嘉正字會之江陵人少有俊才太平興國中舉進士歷官至著作佐郎使于巴陵爲洞庭賦徐鉉見之曰是元虛之流也人多傳寫端拱初太宗召試辭賦擢爲右正言直史館兼直秘閣賜緋魚

銑按賦載本傳

錢熙字大雅泉州南安人陳洪進署清溪令熙初穎悟及長博貫羣籍善屬文洪進嘉其才以弟之子妻之將署熙府職辭不就著楚雁賦以見志尋復辟爲巡官專掌牋奏洪進歸朝熙不敘舊職舉進士登甲科寇准掌吏部選上封薦錢若水陳充王扶洎熙皆有文得試中

書遷殿中丞賜緋魚著四夷來王賦以獻凡萬餘言太宗嘉之卽以本官直史館

銑按王銍四六話錢熙泉南才雄之士進四夷來王賦太宗愛其才擢館職嘗撰三酌酸文世稱精絕略曰渭川凝碧早拋釣月之流商嶺排青不遂眠雲之客又年年落第春風徒泣于遷鶯處處羈遊夜雨空悲于斷雁鄉人李慶孫哭之曰四夷妙賦無人誦三酌酸文舉世傳

吳淑字正儀潤州丹陽人淑幼俊爽屬文敏速韓熙載潘佑以文章著名江左一見淑深加器重自是每有樂義難于措辭者必命淑賦述江南平歸朝嘗獻九

五絃阮頌太宗賞其學問優博又作事類賦百篇以獻  
詔令注釋淑分注成三十卷上之遷水部員外郎

許洞字洞天蘇州吳縣人咸平三年進士景德二年應  
洞識韜略運籌決勝科報罷除均州參軍大中祥符四  
年祀汾陰獻三盛禮賦召試中書遷烏江縣主簿

姚鉉字寶之廬州合肥人太平興國八年進士甲第鉉  
雋爽頗尚氣薛映知杭州與之不協事多矛盾映撻鉉  
罪狀數條密以聞詔使劾之當奪一官特除名貶廉州  
文學吉州之萬安抵虔江有韻右舟行其中湍險萬狀  
鉉過感而賦之以自况

路振字子發永州祁陽人淳化中舉進士太宗以詞場

之弊多事輕淺不能該貫古道因試卮言日出賦觀其學術時就試者凡數百人咸聘貽忘其所出雖當時馳聲場屋者亦有難色振寒素遊京師人罕知者所作賦尤爲典贍太宗甚嘉之擢置甲科

銑按容齋隨筆曰淳化三年太宗試進士出卮言日出賦孫何不得知所出相率叩殿檻乞上指示之上爲陳大義景德二年御試天道猶張弓賦後禮部貢院言近年進士惟鈔略古今文賦懷挾入試昨者御試以正經命題多懵所出則知題目不示以出處也大中祥符元年試禮部進士內出清明象天賦等題仍錄題解摹印以示之至景祐元年始詔御藥院御



試日進士題目具經史所出摹印給之更不許上請  
又按哲宗本紀元祐二年春正月戊辰詔舉人程  
試主司毋得于老莊列子書命題

黃伯思字長睿自幼警敏不好弄日誦書千餘言嘗夢  
孔雀于庭覺而賦之詞采甚麗元符三年進士高等  
晁補之字无咎濟州鉅野人補之聰敏強記纔解事卽  
善屬文十七歲從父官杭州粹錢唐山川風物之麗著  
七述以謁州通判蘇軾軾先欲有所賦讀之歎曰吾可  
以閣筆矣由是知名舉進士試開封及禮部別院皆第  
一補之才氣飄逸嗜學不知倦文章溫潤典綉其凌厲  
奇卓出于天成尤精楚詞論集屈宋以來賦詠爲變離

騷等三書

秦觀字少游一字太虛揚州高郵人少豪雋慷慨溢于文詞見蘇軾于徐爲賦黃樓軾以爲有屈宋才

張耒字文潛楚州淮陰人幼穎異十三歲能爲文十七時作函關賦已傳人口耒儀觀甚偉有雄才筆力絕健于騷辭尤長

周邦彥字美成錢唐人疎雋少檢不爲州里推重而博涉百家之書元豐初游京師獻汴都賦萬餘言神宗異之命侍臣讀于邇英閣召赴政事堂自太學諸生一命爲正居五歲不遷益盡力于辭章出教授廬州知溧水縣還爲國子主簿哲宗召對使誦前賦除秘書省正字

銑按陳氏振聲書錄解題曰元豐七年邦彥進汴都賦自諸生爲太學正汴都賦已載文鑑世傳賦初奏御詔李清臣讀之多古文奇字清臣誦之如素所習熟者乃以偏旁取之爾樓鑰爲音釋附之卷尾

劉弇字偉明吉州安福人兒時警穎日誦萬餘言登元豐二年進士第繼中博學宏辭科元符中有事于南郊弇進南郊大禮賦哲宗覽之動容以爲相如子雲復出除秘書省正字

銑按劉公雲龍集周平園序略曰予嘗論公之文如南郊賦氣格近先漢已爲秦陵簡擢詩書序記往往祖述韓柳間或似之

葛勝仲字魯卿丹陽人登紹聖四年進士第調杭州司理參軍林希薦試學官及詞科俱第一除兗州教授入爲太學正上幸學多獻頌者勝仲獨獻賦上命中書第其優劣勝仲爲首

以上並文苑傳

尹穀字耕叟潭州長沙人性剛直壯厲初處郡學士友皆嚴憚之宋以詞賦取士季年惟閩浙賦擅四方穀與同郡邢天榮董景舒歐陽逢泰諸人爲賦體裁務爲典雅每一篇出土爭學之由是湘賦與閩浙頡頏中年登進士第潭城受兵縱火自焚闔門少長皆死焉

忠義傳

楊璞字契元鄭州新鄭人善歌詩士大夫多傳誦與畢士安尤相善每乘牛往來郭店自稱東野遺民淳化中

召至闕對於便對不願仕進士上賜以束帛遣還故郡

璞既被召還作歸耕賦以見志

隱逸傳附  
萬適傳

何羣字通夫果州西充人嗜古學喜激揚論議雖業進士非其好也慶歷中石介在太學四方諸生來學者數千人羣亦自蜀至方講官會諸生講介曰生等知何羣乎羣日思爲仁義而已不知饑寒之切已也衆皆注仰之羣上書言三代取士皆舉于鄉里而先行義後世專以文辭就文辭中害道者莫甚于賦請罷去介贊美其說會諫官御史亦言以賦取士無益治道下兩制議皆以爲進士科始隋歷唐數百年將相多出此不爲不得人且祖宗行之已久不可廢也羣聞其說不行乃慟哭

取生平所爲賦八百餘篇焚之講官見羣賦旣多且工以爲不情絀出太學羣徑歸遂不復舉進士 全上

蔡確字持正泉州晉江人嘗從吳處厚學賦及作相處

厚通賤乞憐確無汲引意

姦臣傳

邢恕字和叔鄭州陽武人子居實有異才八歲爲明妃引黃庭堅晁補之張耒秦觀陳師道皆見而愛之從恕守隨作南征賦蘇軾讀之歎曰此足以藉手見古人矣卒時年十九

銑按賦今傳居實字敦夫

紹興十七年十二月進士施鏐上中興頌行都賦及紹興雅十篇永免文解自此頌詠導諛愈多 並全上

劉豫字彥游景州阜城人也世業農至豫始舉進士元符中登第建炎四年七月丁卯金人冊豫爲皇帝國號大齊都大名府九月戊申豫卽僞位奉金正朔稱天會八年豫之僭逆也馬定國進君臣各分論祝簡獻遷都國馬賦語多指斥叛臣傳

衛融字明遠青州博興人晉天福初舉進士漢初爲太原觀察支使劉崇稱帝授中書侍郎平章事太祖立融被擒乃授融大府卿賜第京城乾德初郊祀融獻郊禋大禮賦改司農卿出知陳舒黃三州北漢劉氏世家

歷代賦詔卷十一

嘉善浦 銑柳愚輯

遼史

興宗重熙五年秋七月癸巳獵黃花山獲熊三十六賞  
獵人有差冬十月丁未幸南京王子御元和殿以日射  
三十六熊賦幸燕詩試進士于廷賜馮立趙徽四十九  
人進士第以馮立爲右補闕趙徽以下皆爲太子中舍  
賜緋衣銀魚遂大宴御試進士自此始

本紀

道宗清寧二年三月己卯御製放鷹賦賜羣臣諭任臣  
之意六年夏五月戊子朔監修國史耶律白請編次御  
製詩賦仍命白爲序九年六月戊辰親出題試進士

本紀



傳國寶秦始皇作用藍玉螭紐六面其正面文受命于天既壽永昌魚鳥篆子嬰以上漢高祖王莽篡漢平皇后投璽殿階螭角微玷獻帝失之孫堅得于井中傳至孫權以歸于魏魏文帝隸刻眉際曰大魏受漢傳國之寶唐更名受命寶晉亡歸遼自三國以來僭偽諸國往往模擬私製歷代府庫所藏不一莫辨真偽聖宗開泰十年馳驛取石晉所上玉璽于中京興宗重熙七年以有傳國寶者爲正統賦試進士天祚保大二年遺傳國

璽于桑乾河

儀衛志

銑按興宗本紀七年六月乙亥御清涼殿試進士賜邢彭年以下五十五人第 明何文肅喬新椒邱集

有傳國璽志一篇敘述甚詳五代後唐從珂時秦璽燬石敬瑭入洛更以玉爲之重貴獻之遼

陳昭衮小字王九雲州人勇而善射統和中補祗候郎君爲奚拽刺詳穩累遷敦睦宮太保兼圍場事開泰五年秋大獵帝射虎以馬馳太速矢不及發虎怒奮勢將犯蹕左右倅易昭衮捨馬捉虎兩耳騎之虎駭且逸上命衛士追射昭衮大呼止之虎雖軼山昭衮終不墮地伺便拔佩刀殺之輦致上前慰勞良久卽日設燕悉以席上金銀器賜之特加節鉞遷圍場都太師賜國姓命張儉呂德懋賦以美之

本傳

蕭撻寧字馳寧幼敦厚有才畧統和十五年敵烈部入

殺詳穩而叛遁于西北荒撻廩將輕騎逐之因討阻卜之未服者諸蕃歲貢方物充于國自後往來若一家焉上賜詩嘉獎仍命林牙耶律昭作賦以述其功

本傳

銑按遼志林牙翰林學士也

劉三假獻聖宗一矢斃雙鹿賦上嘉其贍麗

見劉六符傳

爲駙馬都尉與公主不諧奔宋歸殺之

耶律資忠兄國留善屬文聖宗重之時妻弟之妻阿古與奴通將奔女直國國留追及奴殺之阿古自經阿古母有寵于太后事聞太后怒將殺之帝度不能救遣人訣別既死人多寃之在獄著兔賦寤寐歌爲世所稱

木傳

耶律庶成字喜隱幼好學書過目不忘于詩尤工重熙

初補牌印郎君累遷樞密直學士與蕭韓家奴各進四

時逸樂賦帝嗟賞

本傳

蒲魯字乃展幼聰悟好學重熙中舉進士第父庶箴嘗

寄戒諭詩蒲魯答以賦衆稱其典雅

附耶律庶成傳

耶律良字習撚讀書醫巫間山學既博入南山肄業留數年而歸重熙中補寢殿小底尋爲燕趙國王近侍以家貧詔乘廐馬遷修起居注會獵秋山良進秋遊賦上嘉之清寧中上幸鴨子河作捕魚賦由是寵遇稍隆遷知制誥兼知部署司事

本傳

蕭韓家奴字休堅涅刺部人少好學弱冠入南山讀書

博覽經史統和二十八年爲右通進典南京栗園重熙

初同知三司使事四年遷天成軍節度使徙彰愍宮使  
帝與語才之命爲詩友嘗從容問曰卿居外有異聞乎  
韓家奴對曰臣惟知炒栗小者熟則大者必生大者熟  
則小者必焦使大小均熟始爲盡美不知其他蓋嘗掌  
栗園故託栗以諷諫帝大笑詔作四時逸樂賦帝稱善  
文學傳

歷代賦話卷十二

嘉善浦 銑柳愚輯

金史

金設科皆因遼宋制有詞賦經義策試律科經童之制  
明昌初又設制舉宏詞科以待非常之士其試詞賦經  
義策論中選者謂之進士律科經義中選者曰舉人凡  
養士之地曰國子監凡學生會課三日作策論一道又  
三日作賦及詩各一篇三月一私試以季月初先試賦  
間一日試策論中選者以上五名申部

選舉志

海陵庶人天德二年始增殿試之制而更定試期三年  
併南北選爲一罷經義策試兩科專以詞賦取士正隆

海陵元年命以五經三史正文內出題大定世宗十九年謂

宰臣曰自來御試賦題皆士人嘗擬作者前朕自選一  
題出人所未料故中選者多名士而庸才不及焉是知  
題難則名儒亦擅場題易則庸流易僥倖也

章宗明昌元年正月言事者謂可以羣經出題而註示  
本傳上是其言以六經十七史孝經論語孟子及荀揚  
老子內出題皆命于題下注其本傳又諭有司曰舉人  
程文所用故事恐考試官或遽不能憶誤失人材可自  
注出處六年言事者謂學者率恃有司全注本傳以示  
之不勉讀書乞減子史經本傳之制省臣謂若不與本  
傳恐碩學者有偶忘之失可令但知題意而已遂命題

注本傳不得過五十字

承安

章宗

五年詔考試詞賦官

各作程文一道示爲舉人之式試後赴省藏之張行簡轉對言擬作程文本欲爲考試之式今會試考試官御試讀卷官皆居顯職擢第後離筆硯久不復常習今臨試擬作之文稍有不工徒起謗議詔罷之

宣宗貞祐二年以會試賦題已會出而有犯格中選者復以考官多取所親上怒其不公命究治之

明昌元年益都府申童子劉住兒年十一歲能詩賦誦大小六經所書行草頗有法孝行夙成乞依宋童子李淑賜出身且加以恩詔上召至內殿試鳳凰來儀賦魚在藻詩又令賦早詩上嘉之賜本科出身給錢粟官舍



令肄業太學

並全

勗字勉道本名烏野穆宗第五子好學問國人呼爲秀才熙宗獵于海島三日之間親射五虎獲之勗獻東狩射虎賦上悅賜以佩刀玉帶良馬能以契丹字爲詩文正隆元年與宗室俱遷中都二年例降封金源郡王薨年五十九大定二十年詔曰大師勗諫表詩文甚有典則其諫表可入實錄其射虎賦詩文等篇什可鏤板行之

始

祖以下諸子列傳

施宜生字朋望邵武人也博聞強記未冠由鄉貢入太學宋政和四年擢上舍第試學官授潁州教授初宜生困于場屋遇僧善風鑒謂之曰子面有權骨可公可卿

而視子身之毛皆逆上且覆腕必有以合乎此而後可貴也宜生聞其言大喜竟從范汝爲于建劍已而汝爲敗變服爲傭泰之吳翁家三年翁異之一日屏人詰其姓名宜生曰我服傭事惟謹主人乃亦寔疑耶翁固詰之則請其故翁曰日者燕客執事咸餒而汝獨孫諸儕且撤器有歎聲是以識汝非真傭也宜生遂告之故翁廬之金夜濟淮以歸試一日獲熊三十六賦擢第一其後竟如僧言

本傳

銑按宋岳珂程史載宜生顛末甚詳今摘其試賦一節于此宜生至燕上書自言道國虛實不見用糜而致之黃龍會赦得釋因以教授自業 有附試畔歸

之士謂之歸義試亮時有意南牧校獵國中一日而獲熊三十六廷試多士遂以命題蓋用唐體宜生奏賦曰聖天子講武功雲屯八百萬騎日射三十六熊亮覽而喜擢爲第一不數年仕至禮部尚書

張景仁字壽甫遼西人累官翰林待制貞元二年與翟永固俱試禮部進士以尊祖配天爲賦題忤海陵旨語在永固傳本傳

銑按翟永固傳永固字仲堅中都良鄉人中天會六年詞賦科遷大常卿考試貞元二年進士出尊祖配天賦題海陵以爲猜度已意召永固問曰賦題不稱朕意我祖在位時祭天拜平對曰拜海陵曰豈有生

則致拜死而同體配食者乎對曰古有之載在典禮  
海陵曰若桀紂曾行亦欲我行之乎于是永固張景  
仁皆杖二十而進士張汝霖賦第八韻曰方今將行  
郊祀海陵詰之曰汝安知我郊祀乎亦杖之三十

高衍字穆仲遼陽渤海人敏而好學自少有能賦聲同  
舍生欲試其才使一日賦十題戲之衍執筆怡然未暮  
十賦皆就彬彬然有可觀年二十六登進士第

本傳

徒單鑑本名按出上京路速速保子猛安人穎悟絕倫  
該習經史大定九年八月詔策女直進士鑑等二十七  
人及第累遷翰林待制兼右司員外郎獻漢光武中興  
賦世宗大悅曰不設此科安得此人

本傳

賈鉉字鼎臣博州博平人性純厚好學問中大定十三年進士泰和章六年御試鉉爲監試官上曰丞相崇浩嘗言試題頗易由是進士例不讀書朕今以日合天統爲賦題鉉曰題則佳矣恐非所以牢籠天下士也上曰帝王以難題窘舉人固不可欲使自今積致學業而已遂用之本傳

銑按楊紫陽跋趙太常擬試賦稿後云泰和丙寅春二月二十五日萬寧宮試貢士上躬命賦題曰日舍天統侍臣初甚難之而太常卿北京趙公適充御前讀卷官獨以爲不難卽日奏賦議乃定旣而中選者纔二十有八人僕甫冠獲試廷下而席屋偶居前列

朝隙聞異香出殿楹間一紫衣人顧余起問題之難  
易及民名里貫年齒而去少頃復相慶曰適駕至耳  
薄暮出宮傳以爲希遇 漢書律歷志太極運三辰  
五星于上而元氣轉三統五行于下其于人皇極統  
三德五事故三辰之合于三統也日合于天統月合  
于地統斗合于人統

任熊祥字子仁燕人登遼天慶八年進士第太祖平燕  
以其地界宋熊祥至汴金人取均房州熊祥歸朝天德  
初熊祥被詔爲會試主文以事不避難臣之職爲賦題  
及御試熊祥復以賞罰之令信如四時爲賦題海陵大  
喜以爲翰林侍讀學士

本傳

揚雲翼字之美天資穎悟日誦數千言登明昌五年進士第一詞賦亦中乙科所著左氏莊列賦各一篇五星聚井各一篇縣象賦一篇

本傳

趙秉文字周臣磁州滏陽人也幼穎悟讀書若夙習登

大定二十五年進士第興定

宣宗

元年轉侍讀學士拜禮

部尚書兼侍讀學士同修國史知集賢院事又明年知貢舉坐取進士盧亞重用韻削兩階因請致仕金自泰和大安以來科舉之文其弊益甚蓋有司惟守格法所取之文卑陋陳腐苟合程度而已稍涉奇峭卽遭絀落于是文風大衰貞祐初秉文爲省試得李獻能賦雖格律稍疎而詞藻頗麗擢爲第一舉人遂大喧噪愬于臺

省以爲趙公大壞文格且作詩謗之久之方息俄而獻能復中宏詞入翰林而秉文竟以是得罪五年復爲禮

部尚書

本傳

銑按獻能字欽叔貞祐三年進士有傳

楊伯仁字安道讀書一過成誦登皇統九年進士第天德二年除應奉翰林文字改左拾遺進士呂忠翰廷試已在第一未唱名海陵以忠翰程文示伯仁問其優劣伯仁對曰當在優等海陵曰此今試狀元也伯仁自以知忠翰姓名在第一遂宿諫省俟唱名乃出海陵嘉其慎密轉翰林修撰孟宗獻發解第一伯仁讀其程文稱之此人當成大名是歲宗獻府試省試廷試皆第一號



孟四元時論以爲知文故事狀元官從七品階承務郎  
世宗以宗獻獨異等與從六品階授奉直大夫

文苑傳

銑按天下書目北京國子監板書有青雲賦五十片  
孟四元賦一百十三片又成德滌水亭雜識國學鏤  
板有孟四元賦孟名宗獻字友之自號虛靜居士金  
時魁于鄉于府于省于御前故號四元其律賦爲學  
者法然金史不入文苑之列惟見于劉京叔歸潛志  
耳

鄭子聃字景純大定府人父宏遼金源令二子子京子  
聃楊邱行嘗謂人曰金源二子鳳毛也小者尤特達後  
必名世子聃及冠有能賦聲天德二年邱行爲太子左

衛率府率廷試明日海陵以子聃程文示邱行對曰可  
入甲乙及拆卷果中第一甲第三人子聃頗以才望自  
負常慊不得爲第一甲第一人正隆二年會試畢海陵  
以第一人程文問子聃子聃少之海陵問作賦何如對  
曰甚易因自矜且謂他日莫已若也海陵不悅乃使子  
聃與翰林修撰纂馘楊伯仁宣徽判官張汝霖應奉翰  
林文字李希顏同進士雜試七月癸未海陵御寶昌門  
臨軒觀試以不貴異物民乃足爲賦題忠臣猶孝子爲  
詩題憂國如飢渴爲論題上謂讀卷官瞿永固曰朕出  
賦題能言之或能行之未可知也詩論題庶戒臣下丁  
亥御便殿親覽試卷中第者七十三人子聃果第一海

陵奇之有頃進官三階除翰林修撰改侍御史

章宗初卽位好尚文辭旁求文學之士以備侍從謂宰

臣曰翰林缺人如之何張汝霖奏曰郝俛能屬文上曰

郝俛詩賦頗佳舊時劉迎能之李晏不及也

党懷英傳

劉昂字昂之興州人大定十九年進士曾高而下七世

登科昂天資警悟律賦自成一家

李純甫字之甫宏州襄陰人幼穎悟異常初業詞賦及

讀左氏春秋大愛之遂更爲經義學擢承安二年經義

進士純甫爲人聰敏少自負其才謂功名可俯拾作矮

相賦以諸葛孔明王景畧自期

王元節字之元宏州人也元節幼穎悟雖家世貴顯而

從學甚謹渾源劉摛賞其才俊以女妻之遂傳其賦學  
登天德三年詞賦進士第並全

歷代賦話卷十三

嘉善浦 銑柳愚輯

元史

太宗始取中原九年秋八月詔諸路考試以論及經義  
詞賦分爲三科事復中止至仁宗皇慶二年十月中書  
省臣奏科舉事取士之法經學實修已治人之道詞賦  
乃摘章繪句之學自隋唐以來取人專尚詞賦故士習  
浮華今臣等所擬將律賦省題詩小義皆不用專立德  
行明經科以此取士庶可得人帝然之考試程式蒙古  
色目人第一場經問五條第二場策一道漢人南人第  
一場明經經疑二問經義一道第二場古賦詔誥章表

內科一道古賦詔誥用古體章表四六叅用古體第三

場策一道

選舉志  
科目

銑按元統三年科舉罷至正元年始復

楊奐字煥然乾州奉天人母常夢東南日光射其身旁  
一神人以筆授之已而奐生其父以爲文明之象因名  
之曰奐金末舉進士不中歲癸巳金元帥崔立以汴京  
降奐微服北渡冠氏東平嚴實聞奐名數問其行藏奐  
終不一語按嚴實領  
東平行臺戊戌太宗詔宣德稅課使劉用之  
試諸道進士奐試東平兩中賦論第一從監試官北上  
謁中書耶律楚材楚材奏薦之授河南路徵收稅課所  
長官兼廉訪使奐博覽強記作文務去陳言以蹈襲古

人爲恥朝廷諸老皆折行輩與之交關中雖號多士名  
未有出負右者

本傳

熊朋來字與可豫章人宋咸淳甲戌登進士第第四人  
自號天慵先生每燕居鼓瑟而歌以自樂嘗著瑟賦二  
篇學者爭傳誦之

儒學傳

陳孚字剛中台州臨海人幼清峻穎悟讀書過目輒成  
誦終身不忘至元中孚以布衣上大統賦江浙行省  
爲轉聞于朝署上蔡書院山長

全上

歷代賦話卷十四

嘉善浦 銑柳愚輯

明史

懿文太子標太祖第一子也母高皇后洪武元年正月立爲皇太子建大本堂取古今圖籍充其中徵四方名儒教太子諸王分番夜直選才俊之士充伴讀帝時時賜宴賦詩商榷古今評論文字無虛日命諸儒作鍾山龍蟠賦置酒歡甚自作時雪賦賜東宮官

明史葉諸王列傳

銑按明紀洪武元年十一月命東宮官作鍾山龍蟠賦時雪賦因賜曲宴

襄王瞻培仁宗第五子母昭皇后永樂二年封宣宗征



漢留守敬恪有令譽宣德四年就藩長沙正統元年徙襄陽英宗復辟四年入朝帝爲製峴山漢水賦及襄陽四時歌親餞之盧溝橋

全上

曾魯字得之新淦人年七歲能暗誦五經一字不遺稍長日取三史記之尋及其餘凡數千年國體人材制度沿革無不能言者遂以文學聞于時洪武初召魯爲纂修元史總裁官謨葺功最多史成賜金帛以魯居首乞還山會開局編類禮書復留魯未幾命主京畿鄉試甘露降鍾山羣臣爭以詩應制魯獨進賦帝命侍臣取諸作更番誦之獨歎魯文整核淳安徐尊生嘗曰南京有博學士二人以舌爲筆者曾得之以筆爲舌者宋景濂

也

明史藁本傳

聶鉉字器之清江人洪武四年進士爲廣宗丞秩滿入覲獻南都賦及洪武聖德詩授翰林院待制改國子助教遷典籍

明史本傳

陳觀以訓導入覲試王猛捫蝨論立擢陝西叅政尋召還侍左右應制作鍾山賦賜金幣

明史藁附蕭執傳

蕭岐字尚仁泰和人洪武十七年詔徵賢良強起之上十便書萬餘言嘗輯五經要義又取刑統八韻賦引律令爲之解合爲一集嘗曰天下理本一出乎道必入乎刑吾合二書使觀者有所省也學者稱正固先生

明史藁附

桂彥良傳

王汝玉名燧以字行長洲人汝玉穎敏強記少從楊維  
植學年十七舉元末浙江鄉試永樂初預修永樂大典  
仁宗在東宮特被寵遇嘗與羣臣應制撰神龜賦汝玉  
第一解縉次之汝玉後進聲名出諸舊臣上與縉及王  
偁輩互相矜許遂被輕薄名

明史葉本傳

銑按焦竑玉堂叢語王汝玉嘗與學士解縉應制撰  
神龜賦汝玉第一名大振然忌者衆竟以他事下獄  
死汝玉爲文兼古今體製而賦尤瞻麗詩語雋永得  
唐人風格舉筆數千言頃刻立就所著有青城山人  
集

嚴本字志道江陰人少通羣籍以歷代刑書惟刑統爲

善傳霖刑統賦辭約義博註者非一乃著輯義四卷永樂十二年以薦徵蹇義試以律疑數析清暢授刑部主

事

明史藁附  
虞謙傳

周敘字公敘吉水人年十一能詩舉永樂十六年進士

選庶吉士作黃鸚鵡賦稱旨授編修歷修撰侍讀直經

筵

明史藁  
本傳

繁昌嚴升建文時進士歷官大理寺右少卿清軍蘇松

執法不撓調南僉都御史與邵玘同心治事剛果自信

嘗作神羊賦以見志焉

明史藁附  
顧佐傳

舒芬字國裳進賢人年十二獻馴雁賦于知府祝瀚遂

知名正德十二年舉進士第一授修撰

明史藁  
本傳

沈鯉字仲化歸德人神宗在東宮鯉為講官嘗令諸講官書扇鯉書魏卞蘭太子頌以進因命陳大義甚悉神宗咨美遂蒙眷

明史蒙本傳

夏允彝字葵仲松江華亭人子完淳字存古生有異稟七歲能詩文年十三擬庾信作大哀賦文采宏逸允彝死後二歲以子龍獄詞連及亦逮下吏談笑自如臨刑神色不變年甫十八

明史蒙附允彝傳

錢惟善字思復錢唐人至正元年省試羅剎江賦時鎖院三千人獨惟善据枚乘七發辨錢塘江為曲江由是得名號曲江居士

明史文苑傳

銑按朱葵尊曝書亭集七發廣陵之曲江即浙江曲

與浙義均也故其詞曰弭節伍子之山通厲骨母之  
塲注以爲骨母胥母之譌也曾鞏序鑑湖圖有所謂  
廣陵斗門者在今山陰縣西六十里去浙江不遠而  
錢塘郭外有廣陵侯廟迄今猶存至若江都之更名  
廣陵在元狩三年時乘已卒不應先見之于文是七  
發之廣陵非江都也明矣世人以廣陵二字遂誣曲  
江在揚州指城東小水以實之可笑也

常熟桑悅字民懌以才名吳中在京時見高麗使臣市  
本朝兩都賦無有以爲恥遂賦之

全上

崑山夏景字仲昭永樂十三年進士景與上元張益同  
中進士同以文名同善畫竹其後景見益石渠閣賦自

謂不如遂不復作賦益見景所畫竹石亦遂不復畫竹

明史藁附  
王綬傳

李濂字川父祥符人舉正德八年鄉試第一明年成進士濂少負俊才時從俠少年聯騎出城搏獸射雉酒酣悲歌慨然慕信陵君侯生之爲人一日作理情賦友人左國璣持以示李夢陽夢陽大嗟賞訪之吹臺濂自此聲馳河雒間

明史藁  
本傳

銑按川父明山西按察僉事有嵩清集一百卷

高叔嗣字子業祥符人年十六作申請賦幾萬言見者驚異十八舉于鄉第嘉靖二年進士

明史藁  
本傳

貝瓊字廷琚一名闕字廷臣崇德人性坦率篤志好學

年四十八始領鄉薦洪武初聘修元史既成受賜歸六年以儒士舉至京師除國子助教瓊嘗慨古樂不作爲

大韶賦以見志

明史葉文苑傳

銑按大韶賦序傳曰堯作大章舜作大韶韶繼也言舜能繼紹堯之德也周禮曰大韶禹樂名也言禹能大堯舜之德也前乎舜者堯非不繼譽也後乎堯者禹非不繼舜也特于舜言繼者法成乎堯也在譽之時法猶未成堯雖繼之而可繼之事未備舜協于帝在舜之時功爲已協禹雖繼之不足爲難矣則可繼之善善繼之功唯舜獨也是韶爲舜之樂無疑季札觀樂見舞箭韶者曰德至矣盛矣如天之無不覆幬



如地之無不持載雖甚盛德蔑以加矣後孔子學之  
于齊三月不知肉味曰不圖爲樂之至于斯也蓋知  
樂之盡善盡美莫過于韶宜當時之感召丹朱在位  
羣后德讓祖考來格鳥獸跄跄鳳凰來儀也然非舜  
之德致和于上夔之樂召和于下何以臻此哉故述  
而爲賦不徒極其聲音之美而且本之舜之德云

盧柟字少梗濬縣人博聞強記落筆數千言爲人跡弛  
好使酒罵坐嘗爲邑令捕繫獄柟居獄中益讀所携書  
作幽鞠放招二賦詞旨沉鬱謝榛攜入京師見諸貴人  
泣訴其冤狀曰生有一盧柟不能救乃從千古哀沅而  
弔湘乎平湖陸光祖選得濬令因榛言平反其獄柟騷

賦最爲王世貞所稱

俞允文字仲蔚崑山人也年十五爲馬鞍山賦援据該

博長老異之

並全上

袁中道字小修十餘歲作黃山雪二賦五千餘言

明史袁附

道傳

蔣烈婦丹陽姜士進妻幼穎悟喜讀書歸士進數年士進死婦命于總帳前掘坎埋大缸貯水防者稍不戒濡首缸中死爲文脫稿卽毀所存列女傳及吳夫文四首

夢夫賦一篇此弟文止竊而得之者

明史列女傳

沈周字啓南長洲人年十一遊南都作百韻詩上巡撫侍郎崔恭面試鳳凰臺賦援筆立就恭大嗟異

明傳隱逸

嚴嵩字惟中分宜人帝將祀獻皇帝明堂以配上帝已  
又欲稱宗入太廟嵩條畫禮儀甚備禮成賜金幣帝上  
皇天上帝尊號寶冊尋加上高皇帝尊諡聖號以配嵩  
乃奏慶雲見請受羣臣朝賀又爲慶雲賦大禮告成頌  
奏之帝悅命付史館

明史蔡  
奸臣傳